

**HEADLINES (EVENING)**

1. Khawvel puma thisen pe thin tute pual ni pawimawh, ‘World Blood Donor Day’ chu vawiin khan Mizoramah hman a ni.
2. Ni hnih chhung awh Mizoram Sports Conclave 2024 Aizawla neih chu hlawhtling taka hman a nih hnuah vawiin khan khar a ni.
3. Darkar 60 kalta chhunga ruahsur nasa avangin Sikkim-ah khualzin tourist 2000 chuang an tangkhang
4. Italy-a G7 Summit neih mekah Prime Minister Narendra Modia a tel.

<><><>

**WORLD DONOR DAY**

Vawiin hi khawvel puma thisen pe thin tute pual ni pawimawh, ‘World Donor Day’ a ni a, Mizoram-ah pawh he ni pual hian Vanapa Hall, Aizawl-ah Health Minister Pi Lalrinpuii hoa hun hman a ni.

Health Minister Pi Lalrinpuii chuan damlo thisen mamawh tuten an hman tur mahni taksa ami ngei sawr chhuaka midangte tana thisen hlu tak hlan thin tute chu Mizoram mipui te’n zahna chibai an buk thar leh tih a sawi a. Thisen petute avangin nunna tam tak chhanchhuah a ni a, thi mai tura ding tawh ten lei rem rap lehin khawvel hi a tharin an hmachhawn ve leh mek a ni tih hre thar leh theuh turin kalkhawm te a chah a ni.

MSACS Project Director report in a tarlan danin kum 1993 atang khan record neih tan a ni a, hemi kum 1993 hian thisen pek zawng zawng chu unit 3,119 a ni a, heng zinga voluntary a pek chu Unit 56 niin hei hi 100-a 1.8 chauh a ni a. Kum 2023 atanga 2024-ah chuan Voluntary Donation hi 100-a 91.22 a tling tawh a ni.

Lunglei ah chuan Association for Voluntary Blood Donation, Lunglei buatsaihin Nursing School, Lunglei Auditorium ah hun hman a ni a. HPC Vice Chairman Pu V Malsawmtluanga, chuan Lunglei mipuite chu Thisen pek kawngah thangharh sauh suah tura fuihin, Pathianin Thisen hmanga a chhandam kan nih ang takin, kan mihringpui te nunna chhan tura thisen pek chu Pathian lawm zawng tak a ni a ti.

World Blood Donor's Day pualin Kolasib District Hospital Blood Centre ah MSACS, AVBD, Kolasib leh Kolasib Blood Centre te tangkawp buatsaih in hun hman ani a, he hunah hian Kolasib Chief Medical Officer (CMO) Dr. RK Lalthlamuana chuan, Pathian chauh in a siam theih thisen hlu tak mi dangte nunna chhan nana pe phal an awm thin chu lawmawm a tih thu a sawi a, thisen hlu tak hlan phaltute thil tih chu a Pathian thu in, a Mizo em em ani, a ti. Vawiin hian Kolasib College Veng Branch YMA chuan Kolasib District Hospital Blood Bank-ah a mamawh apiangte hman atan YMA Day denchhen in thisen 29 an pe a, thisen petute hi mipa 18 leh hmeichhia 11 anni.

Association for Voluntary Blood Donation, Champhai District bul tumin Champhai a Information dept. Auditorium ah World Blood Donor Day hi hman a nia, he hunah hi Dr.PC.Lalhminglana, Senior Chief Medical Officer in a hmanpui a, kum kalta a thisen petu, Kohhran thalai te,tlawmngai pawl hrang hrang te leh mimal thisen pe tam bikte hnenah chawimawina thuziak a hlan.

Serchhip-ah pawh Thisen petute Ni hi Serchhip CMO Conference Hall-ah Association for Voluntary Blood Donation (AVDB) Serchhip buatsaihin Programme hman a ni a, he hun hmanpuitu Serchhip District Senior CMO Dr L.P Malsawma chuan thusawiin, mihringte tana Thisen hlut thu leh Thisen pek chu mihring nunna atan a pawimawh anih thu a sawi.

MSACS, District Hospital Lawngtlai Blood Bank leh Association for Voluntary Blood Donation (AVBD), Lawngtlai te tang ho buatsaihin Lawngtlai Bazar YLA Hall Committee Room-ah he hun hi hman a ni a.

He hunah hian Lawngtlai District-a mimal thisen vawi 50 pe tling chin mi 5 leh vawi 30 pe tling chin mi 10 hnenah chawimawina thuziak hlan a ni a. Nikum June ni 14

leh kumin June ni 14 inkara pawl leh kohhran anga thisen pete - Lawngtlai Area Thalai Kristian Pawl Coordination Committee (LATKP); Lairam Isua Krista Baptist Kohhran Central Thalai Pawl; Government Lawngtlai College NSS; 3rd Battalion IR, Lawngtlai; PYD (Mizoram) Lawngtlai Pastor Bial leh Assam Rifles, Lawngtlai te hnenah chawimawina thuziak hlan a ni bawk.

<><><>

#### **RS MP**

Rajya Sabha MP Pu K. Vanlalvena Mizoram dinchhuahna tur chuan sum dehchhuah leh intodelh tura hnam anga tanrual- Economic Nationalism ngaih pawimawh hmasak ber a tul a ti.

Vawiina MNF Party Office Mizo Hnam Run-a an party inkhawmah thusawiin Pu Vanlalvena chuan Nationalism nei lo hnam an dinchhuak ngailo a ti a, hnam ding chhuak tawh sa pawh nationalism an neih loh chuan an buai zel a. Mizote chu political nationalism-ah chuan an thangharh tawh hle a. Assam, Manipur leh Burma lamah buaina neuh neuh an tawh changin an tangrual tha a, economic nationalism-ah erawh mit a la keu lo hle a ni, a ti.

Pu Vanlalvena chuan sakhaw vawn - Religious nationalism vawng nung zelin economic nationalism ngaih pawimawh ber tur a ni a ti a. Tangka a hausa ringawt hi hausa an ni lo a, sorkar hnathawk hlawh pung thur thurin Mizoram state per capita income sang hle mahse; vai ram atanga ei tur chawkluh theih loh chuan nghei a hmasak tho a ni a ti.

Khawvela ram lian apiang economic nationalism-ah an chiang a. Mizoramah erawh Dawr tinah artui an zuar a, vai artui vek a ni a. Bawng lah khawchhak lam atanga chawkluh hlir a ni a. Mizoramah buh, vaimim leh bekang, an chaw tur pawh a tha duh em em a, heng ti hlawhtling a mahni sum dehchhuahna economic nationalism-ah hian harh thar a hun tawh takzet a ni a ti.

<><><>

#### **HEALTH CENTRE SOLAR ENERGY**

SELCO Foundation in Mizoram a Health Centre 331 Ni zung chakna (Solar Energy) hmanga an thawm that te chu Mizoram sorkar Health & Family Welfare Department kutah vawiin khan hlan a ni.

Mizoram hmun kilkhawr a Health Centres te chu awmze nei leh mumal zawkin thawm that leh tih changtlun mek zel a ni a, SELCO Foundation te chuan Mizoram hmun kilkhawr a Health Facility 331 ah Solar Energy based system (Ni zung chakna hman theihna) a bun tawh a ni. Heng khawl te hi Health Department kutah a enkawl chhonzawm hna a pe fel tawh bawk a, a thawhkhatna atan Health Centres 438 zing a 331 chu he Ni zung chakna hmanga thawm that leh tih changtlun a ni tawh a, a bak zawng te chu a thawhnhina atan dah a ni.

He huna tarlan a nih dan chuan, he hmalakna hian Chatlak lo leh rintlak zawk a damlo enkawlina a puih mai bakah, Ni zung chakna hman hian state intodelhna leh sik leh sa inthlak avanga harsatna awm thei lakah kawng tam takin a veng thei a, vawiin thleng hian he thil avang hian Ni zung chakna 690 KWp zet deh chhuak tawh a ni

Vawiin inkhawmah Health Minister, Pi Lalrinpuii chuan ni zung chakna hmang a Health Facility thawm that hian Nau nei thei tur a hmathlir te, hridanna pek te leh Mizo mipuite tana atha ber min chhawpchhuah sak thei dawn a, He thil hian Mizo mipuite ah nghawng tha tak a neih an beisei a, state dangte tan pawh he hmalakna hi entawn tlak tak a nih a beisei thu a sawi.

<><><>

#### **SPORTS CONCLAVE**

Ni hnih chung awh Mizoram Sports Conclave 2024 chu Baptist Centre, Falkland-a hlawhtling taka hman a nih hnuah vawiin khan khar a ni a. Conclave chung hian kum 2036 Olympic Games-a Mizo infiammi tam thei ang ber tel theihna'na ke pen dan tur thlirhona hun hman a ni.

He Conclave-ah hian Meghalaya Sports Minister Pu Shakliar Warjri leh Assam Sports Minister Pi Nandita Garlosa te lo kalin 2036 Olympic Games hmathlira nei chung a hmalak theihna kawng hrang hrang an sawi a. Anni bakah hian India rama infiamna lama sulhnu lian tak nei Reliance Foundation, Tata Trusts leh Jindal group atang te in an mithiamte leh mawhphurhna lian chelhtute an tel a. Services Sports

Control Board hotu te, India rama sports federation leh association hrang hrang hruaitu te, Indian Olympic Association hruaitute bakah ram chhung leh pawn atangin sports journalist leh infiammi langsar tak tak te an rawn kal a ni.

Mizoram Sports Conclave nihnihnaah hian kum 2036 Olympic Games thlir chunga hmasawn theihna tur thupui hrang hrang zirho a hun hman chhunzawm a ni.

Conclave tawp niah hian Assam Sports Minister bakah Mizoram sorkar-a Sports & Youth Services Secretary Pu Lalramsanga Sailo, Sports & Youth Services Department Director Pu Lalnunhlua leh Mizoram State Sports Council Secretary Pu John Tanpuia te an tel bawk a ni.

<><><>

#### **SIKKIM RAIN HAVOC**

Darkar 60 kalta chhunga ruahsur nasa avangin Sikkim-ah khualzin tourist 2000 chuang an tangkhang. State chhung hmarlamah chhياتna a thleng nasa hle a. Teesta River chim chin a san zel avangin lei hlui a chim a, hei bakah hian Sanklang-a baily bridge thar a chhe bawk. Hei vang hian North Sikkim-a Dzongu region kalpawhna a chhia a, mi 2000 chuang an tangkhang nia thudawn a ni.

District Magistrate Hem Kumar Chettir chuan nimin khan inhmukkhawm koin chhياتna thlen dan hrang hrang an thlir let a. Mi parukin an thih phah thu tarlan niin pathum hi Pakeshep ami niin pathum dang hi Ambithang ami an ni a. Ambithang leh Kabi ah hian chhياتna thleng avanga hliam tuar an awm bawk a ni. Hei bakah hian Namchi leh Gangtok district ah chuan inkalpawhna kawngpui tam tak tuin a chim chhia a ni.

<><><>

#### **PM @ G7**

Italy-a G7 Summit neih mekah Prime Minister Narendra Modia a tel. Pu Modia chuan Italy a pan hmaa a thuchhuah siamah India-Italy thawhdunna tilian zel tur leh Indo-Pacific-a leh Mediterranean chhehvela an thawhdunna tihlen zel chu sawrkar tum a ni a ti. G7 Summit chhung hian PM Modia hian French President Emmanuel Macron, UK Prime Minister Rishi Sunak, German Chancellor Olaf Scholz, Italy Prime Minister Georgia Meloni, Japanese PM Fumio Kishida, leh Ukrainian President Volodymyr Zelensky.

Tun tum hi a term thumna atana Prime Minister anih leh hnua Prime Minister Modi-an ram pawn a tlawh hmasak ber tur a ni.

<><><>

#### **LOK SABHA SPEAKER**

Congress President Mallikarjun Kharge chuan NEET exam buaina chungchangah sawrkar laipui na takin a bei a. Sawrkar chu National Testing Agency thuneihna hmang sualah puhin mark leh rank nasa taka tih chingpen a ni a ti a. Pu Kharge chuan sawrkar lakah zawhna siamin thalai nuai 24 chuangte beiseina a ti chhe vek a ni a ti.

<><><>